



Podgorica, 15.11.2012

DUG PUT TO TOLERANTNOG DRUŠTVA

Povodom Međunarodnog dana tolerancije - 16.novembra, Centar za građansko obrazovanje (CGO) koristi priliku da pozove sve društvene subjekte na veći stepen otvorenosti, razumijevanja i uzajamnog poštovanja.

Međunarodni dan tolerancije ustanovljen je Deklaracijom Ujedinjenih nacija 16. novembra 1995. na Generalnoj konferenciji UNESCO-a u Parizu. Prema ovoj deklaraciji, tolerancija je prihvatanje činjenice da "ljudska bića, prirodno različita po izgledu, položaju, govoru, ponašanju i vrijednostima, imaju pravo da žive i budu to što jesu". Visok stepen tolerancije i poštovanje ljudskih prava su vrijednosti na kojima se temelji i Evropska unija, a evropskim ugovorima je predviđeno da članstvo u EU može da zatraži bilo koja evropska zemlja koja poštuje zajedničke vrijednosti. Upravo vrijednosni okvir država članica EU čini da u njihovim društvima preovlađuju pluralizam, odsustvo diskriminacije, tolerancija, pravda, solidarnost i ravnopravnost između muškaraca i žena.

Crna Gora je donijela veliki broj propisa koji treba da doprinesu stvaranju klime koja će razvijati i njegovati toleranciju. No, jaz između proklamovanih politike i zakona na papiru, na jednoj strani i prakse, na drugoj strani je još uvijek nedopustivo veliki. Tako Crna Gora ostaje društvo koje je još uvijek daleko od tolerantnog, odnosno onog u kojem se poštuju različitosti, a svi građani i građanke neometano ostvaruju svoja prava. Primjeri takve prakse su mnogobrojni, a njoj su najviše izložene osobe sa invaliditetom, LGBT populacija, Romi, nacionalne manjine, žene, siromašni, lica koja se odvikavaju od bolesti zavisnosti, HIV pozitivne osobe, itd. Ti oblici netolerancije svoje izraze imaju u društvenoj marginalizaciji ovih grupa, diskriminaciji prilikom zapošljavanja, pristupu zdravstvenim uslugama ili socijalnoj zaštiti, a nerijetko su mete verbalnih i čak fizičkih napada u čijoj je osnovi mržnja, koja zahtijeva efikasnu sankciju i nadležnih organa i samog društva.

Jasno je da se ovi problemi ne mogu ni jednostavno ni brzo riješiti. **Neophodan je uporan, sistematski i organizovan rad različitih dijelova društva na stvarnoj demokratizaciji društva a tolerancija je bitan element tog procesa. Stoga, CGO apeluje na organe vlasti da se učine dodatni naponi i aktivnosti kojima bi se spriječili svi pokušaji napada na čovjeka, imovinu i druga ljudska prava, a sve u cilju razvijanja osjećaja i brige za drugoga i drugačijeg. Ovo je posebno važno za naše društvo u kojem se demokratski procesi tek uspostavljaju, u kojem su demokratske institucije i onda kada postoje vrlo krhke i podložne negativnim uticajima.**

Tamara Milaš
Saradnica na programima